

才居上不肖居下三軍悅樂士卒畏懼相議以勇鬪相望以
威武相勸以刑罰此必勝之徵也三軍數驚士卒惰慢下無禮
信人不畏法相恐以敵相語以利相囑以禍福相惑以妖言此
必敗之徵也

假權

夫將者人命之所懸也成敗之所繫也禍福之所倚也而上不
假之以賞罰亦猶束猿狖之手而責之以騰捷膠離婁之目而
使之辨青黃不可得也若賞在權臣罰不由將人苟自利誰懷
鬪心雖伊呂之謀韓白之功不能自衛也故孫武曰將之出也
君命有所不受亞夫曰軍中聞將軍令不聞有天子之詔也

道藏輯要

忠武侯集
心書

三

星集二
川上八

哀死

古之善將者養其人如養愛子有難則以身先之有功則以身
後之傷者泣而撫之死者哀而葬之饑者捨食而飼之寒者解
衣而衣之賢者禮而祿之勇者賞而勸之將能若此則所向必
捷矣

三賓

夫三軍之行也必有賓客共議得失以資將用有思若懸泉奇
謀不測博聞廣見多藝碩才者此萬人之望可以爲上賓有猛
如熊虎捷若騰猿剛共鐵石利若龍泉此一時之雄也可以爲
次賓有多言或中薄能小奇此常人之能可引爲下賓